



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,

Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS,

manè discutienda in Scholis Medicorum, die Jovis decimâ-quartâ  
mensis Novembris, anno Domini M. DCC. LXXI.

M. CAROLO-GEILLE DE SAINT-LEGER,

Equite, Consiliario Medico Regis ordinario, primi ordinis & totius Equestris  
agminis in exercitu Medico primario, Doctore Medico Præsîde.

*An acutè febricitantibus temperata cubiculâ?*

I.



PRIMÆVOS apud parentes patenti puroque aëri in plateis ex-  
ponebantur ægri, quos lecto jacentes adire, remediaque priùs in  
simili casu proficua edocere viator quicumque tenebatur. Lau-  
dabilis eâ ætate aureâ mos erat ut, qui è morbo emerferant,  
historiam suæ sanationis templo memoriæ dicarent. Sic impulsu  
naturali & certo egerunt Assyrii, Babilonii, Chaldaei; Magi,  
Ægyptii, Cyrenæi, Crotonæi, totiusque Mesopotamiæ tractus,  
usquedum in Græciam migraverit hæc medicina naturalis, ac in Cnido, Rhodo,  
Co, insulis effluerit. Primus veri nomine medici dignus Hippocrates à prisci  
usibus, quæ experientiâ aut ratiocinio judicaverat insalubria, ablegavit: clinica

101  
arti iustas ac meritas laudes impertiendo, ægrotos intra cubicula detinere sapientius & utilius existimavit. Acutas febres nec in caldariis nec in hypocaustis curabat; sed ærem novum identidem spirabant ægri, sæpe etiam ventorum suavitate salubritateque fruebantur. Sic Naturâ consultâ opportunè oriebantur crises certò morbum judicaturæ, unde sanitas firmior vitæque longior. Nonne quod simplicius & naturæ magis consentaneum, id salubrius? Ecquid acutè febricitantibus simplicius & magis arridens, quàm amæni cubiculi, ac temperati ærcm inspirare.

## I I.

**F**EBRIS omnium morborum frequentissimus, morbos inflammatorios semper, cæteros quam sæpissimè comitatur. Hinc medicorum adagium, *febres duæ fere tertiæ omnium morborum partes*. Febrim esse instrumentum naturæ quo partes impuras à puris fecernit nemo clinicus, nemo dogmaticus dissitetur. Præcipuarum functionum læsio, pulsus velocitas, calor, tria sunt phænomena quorum præsentia febrem adesse, absentia verò eandem desesse, medicum edocet. Quæ quidem signa & in continuis & in intermittentibus, eum in ephemera benignâ tum in caulo semper occurrunt, ne excepto quidem typho seu genuinâ malignâ, quiddid contraxerint pathologi. Febrim numerosa cohors, omnesque earum differentiæ ex gradu velocitatis & spatio peragrato desumuntur. In acutas & lentas primo intuitu distribuuntur. Acutæ dicuntur, cum mox enarrata symptomata pathognomonica eiò & cum periculo decurrunt. Ab illis ephemeram nè quidem excipimus, licet post Cellum plurimi contendant tale morborum genus neque acutum dici posse quia non perimit, neque utique longum quia, si occurrit, facillè sanatur. Huiusce sententiæ adversariis ephemeram vulnerariam & ephemeram sudatoriam satis est obijcere. Subdivisionem febrim in acutas simpliciter & peracutas tacemus, hæc potius ad theoriam quàm ad praxim attinet. Lentæ vocantur febres, quando symptomata supramemorata tardè seu imminente seu deficiente vitæ periculo morbi stadia percurrunt. Si sub secundo respectu perpèndantur febres, erunt vel continuæ, vel exacerbantes, vel intermittentes. Hæc postrema species ad lentarum classem reducit, acutarum ordinem duæ priores subeunt. De hisce tantum febribus acutis hodie differere nobis est animus.

## I I I.

**Q**UÆ assiduo, sine intermissione & cum eodem tenore usque ad ægritudinis decrementum vigent febres, continuæ nuncupantur. Si pyrexia pluries in decursu morbi crescit & decrescit, itec omnino recedit & typus sæpè confusus apparet, tunc exacerbantis seu remittentis nomine insignitur. Hinc magnum inter utramque febrim interest discrimen; continuæ semper simplex est, rarò implicata: remittens verò semper composita & quam sæpissimè implicata. Harumce febrim causa multiplex & ab omnibus quæ valent corpus afficere, repetitur. Talia sunt ingesta, gesta, retenta & applicata. Cur eadem naturam hodie juvant, cras lædunt illam? Illud edocent ratio simul & experientia, istudque phænomenon eodem intuitu medici omnes accipiunt. Utinam de methodo acutè febricitantibus medendi pariter inter se consentiant! Medicinæ pars præcipua dicitur Therapeutica quia tum morbum præsentem tollit, tum futurum arcet. Quamobrem triplici, ut ita dicam, uritur armamentario, Diætâ scilicet, Pharmaciâ & Chirurgiâ. An hæc sufficiant, affirmare non audemus. Ministrum principem [ ærem ] silènt scriptores clinici plerique. Ad vitam sum-

mè necessarius, continuò inspiratur : illius ergo vires morbi viribus longè præcellunt; quod quidem jamdiu Hippocrates, Asclepiades, Cælius Aurelianus, Sennertus, Riverius & Sydenhamus invictis experimentis confirmavere. Aëris laudes nonnulli quotidie prædicant haud infimæ notæ viri medici, sed ineluctabili fato vox in auras inanis avolat. In cameris angustissimis plerumque decumbunt febricitantes, in lecto tanquam in tumulo conssepulti. Corpus plumeis culcitis quasi immersum stragulis oneratur. Hyemali semper nec rariùs verno & autumnali tempore, assiduo igne ardet focus. Vigente ætate sæpissimè deficit ignis, sed stricte occluduntur cubicula, fenestrisque accuratè obturatis, acris conclusus nec vagandi potens, versando conservescit, inde gravis, impurus & quasi pestilens agrorum pulmones subit; inde vel irrita evadunt indicata ritèque præscripta acutè febricitantibus remedia, vel lentum ideòque fastidiosum eis levamen asserunt.

## I V.

**S**I medicus naturæ minister & interpretes ipsi non paret, ipsi pariter non imperat. Morbus quilibet est naturæ conamen materiæ morbificæ exitum, in ægri salutem omni ope molientis. Illud conamen denuntiat febris, & hanc toties adesse diximus quoties & præcipuorum munerum læsione, & velocitate pulsus, & calore laborat æger. Illud ergo potissimum incumbit medenti, ut naturæ conatus vividiores ac effræncs moderetur, languidos & torpentes excitet, ritè procedentes nequaquam perturbet, inordinatos tandem regat. In febris acutis naturam strenuè reluctantem laceffit hostis, totoque corpore sævit mars avidus. Diræ morti brevior pateret via, nisi quis medium intra certamen sese immitteret, litem compositurus. Assulit ubi curationis spes, febricitans intus & extrinsecus temperandus venit. Ex diatâ pharmaciæque tantum temperantia ne deprompseris auxilia : atmosphæram consulas, & hanc perutilem secundamque ægrotanti reddere labores. Experientiâ quotidianâ constat magis optatam & nobis salubriorem esse mediâ aëris temperiem. Etenim atmosphærâ nimis calidâ dissilantur tenuiores corporis nostri liquores, copiosior promovetur perspiratio, inspisantur fluida & motui inepta evadunt. Frigidiorè verò tantum mutatur morborum facies: Pulmones totiusque corporis habitus frigore comprimuntur, coarctantur cutis spiracula, sufflaminatur perspiratio, ad interiora propelluntur humores excrementitii. Hinc quanti sit momenti febricitantibus aërem præbere temperatum ! Hoc relaxantur fibræ, cutis flectitur rigiditas; sistitur pulsus velocitas, evanescent sudores qui falsum solamen afferebant, imminuitur calor : tum leni salubris aëris sensatione corporis recreantur organa, purior ac facilius aura trahitur, mollitiem adipiscuntur singulæ partes, assueta recipiunt munia, placida liberaque sit sanguinis circulatio, promptior tutiorque morbi solutio.

## V.

**A**CCOMMODATAM ægro concedere aëris temperiem negotium prorsus facile; solius Thermometri Reaumuriani ope solvitur nodus. Id enim varios atmosphæræ status æquilibrio constanti indicat, inter quos eminet gradus *temperatus* dictus. Decem lineis, ut norunt omnes, congelationis gradum superat; eo regnante nec æstuat nec hyemat tempus, & robore quasi Herculeo donantur corpora. Non mirum igitur quod gradum Thermometri Reaumuriani temperatum, ut febricitantibus magis consonum & præstantiorem constituamus. Gradum in eodem thermometro *sub cubiculi agrorum* nomine designatum improbamus. Temperatum septem gradibus antecedit, ideòque nimis æstuosus

est, & ægris maximè nòxius. Quid nunc facilius, quid simplicius quàm temperata reddere cubicula? Si æger acutà febre corripitur tempore frigido, intra hujus cubiculum affigatur thermometrum, ignis accendatur ut gradum temperaturam spiritus vini possit attingere. Quo factò semper idem servetur calor, nec ascendat nec descendat liquor in tubo contentus, tunc auram nonnisi moderatam ducit æger. Qui contra ferventi tempestate febricitat, cameram domus amplissimam quæ versus septentrionem spectet, debet incolere. Ibi lecto teneatur auleis apertis, crinità culcitā jacens, unoque tantum stragulo coopertus. Diversis postea modis refrigeretur cubiculum; illud sat temperaturam judicabis cum ad decimum supra congelationem gradum thermometrum descenderit. Hunc nos attingimus scopum si ostia cubiculi omnia, omnes quotquot sunt fenestras adaperiamus. Ipsorum loco suppara pandimus, sic longā velorum arietatione quatuor aer, & salubris perflat Favonius. Diu noctuque afflantis hujus venti humore benigno molliuntur ægotantis organa, leni illius calore citò moderatur febris & hostem plerumque fugat natura. Aliàs tabulata laterculave modò cum aquâ glaciali, modò cum aceto, modò cum cæteris vegetabilibus acidis irrigamus. Plantas recentes inodoras, ac in undis puris crescentes circa febricitantem admovemus; lintea quoque frigide madida cubili suspendimus. Aliquando tandem spiraculis, ventilabris, foliis, aut flabellis utimur. Horumce simplicium remediorum beneficio quassatur aer, nequaquam stagnat, morbum præsentem arcet nedum novum accersat. Formulæ porro expositis quibus aer præparandus est in febris acutis, concludere quid impedit:

*Ergò acutè febricitantibus temperata cubicula.*

# DOMINI DOCTORES DISPUTATURI.

M. Joannes-Baptista LANGELOIS.

M. Antonius-Joannes-Baptista-Maclovius GUENET.

M. Ludovicus - Gabriel D'UPRÉ, Serenissimi Principis Condæi Consiliarius Medicus.

M. Henricus RAIMOND, Regis exercituum in Insula Corsicâ Medicus.

M. Paulus - Gabriel LEPREUX.

M. Antonius PETIT, in Horto Regio Anatomæ & Chirurgiæ Professor, & Regiâ Scientiarum Academiâ, & Militarium Regni Nosocomiorum Inspector.

M. Carolus - Nicolas D'ESLON.

M. Ludovicus - Claudius GUILBERT, Antiquus Regis exercituum Medicus ordinarius.

M. Stephanus POURFOUR DUPETIT.

Proponebat Parisiis TUSSANUS GUINDANT, ex Virzione apud Bituricenses. Doctor Medicus Monspelienfis, Nosocomii Aureliæ Antiquus Medicus, Collegii Medicorum, Regiæque Societatis Rei Agrariæ ejusdem civitatis Socius, necnon Saluberrimæ Facultatis Medicinæ Parisiensis Baccalaureus.

A. R. S. H. 1771. A. SEXTA AD MERIDIEM.

Typis Quillau, Universitatis & Facultatis Medicinæ Typographi, 1771.